

榕陰新檢

榕陰新檢卷十一

閩徐熾興公輯

欽吳洵美克符校

冥報

堊僧得子

洪武中閩人陳三使家貧時京師有僧辭禪師南遊
師語之曰汝到閩可訪陳三使僧至閩尋見之陳待
以齋膳留宿後僧得疾語陳曰我化緣得銀百兩今
來訪汝豈期堊身此地此銀爲我埋堊餘還我師陳
曰諾乃出已財殯堊之將前銀寄還禪師後陳妻子

相繼而沒一日遇術士相之曰此老陰騰紋滿面當
有二子大貴術士爲之區畫娶妻陳七十妻連生二
子曰循曰景著後景著及第循及諸孫並登科

群談

採餘

返魂寄信

嘉靖間閩縣萬壽橋男子王甲死而復甦告其子曰
吾頃者爲一甲卒所縛至一大府門下遇陳都憲紀
題吾舌令報其子孫因伸舌舌有字云前受貴裔後
貶孤兒泰圖有出八卦先推錯忙猶寄語子孫福不
徹買臣寄迹決登皇基冥司大尹書其子急呼鄰人

錄之字跡隨錄隨滅錄竟復死

晉安逸志

掩墓全舟

閩縣人王詔素長者弘治間隱居石室山夢有人云
吾自紹興三年居茲地矣明日將有毀我屋者非公
弗能救詔覺而異之次日出觀鄉人治園掘地少許
得石壙詔驗其蓋有宋聞人之墓紹興三年造十字
亟命掩之因得勿壞後其子子聰仕爲掣於潛令適
詔卒於官舍子聰扶襯歸夜夢一人稱宋聞人求謁
謂之曰明日有大風當停舟勿行子聰達旦起視天
色霽甚因托它故戒舟人遲發日中忽風浪大作凡

先放舟者盡葬魚腹惟子聰一船得亡恙焉

北園王

氏世譜

貴人度鬼

候官唐虞微時泊舟永福溪夜聞二鬼共語忽一鬼
吟詩曰隨波逐浪滯孤魂白骨沉沙漾水痕幾寸柔
腸魚齒斷不關今夜聽啼猿又有吟者曰饑烏送我
棠梨道雨打風吹梨樹老寒食何人奠一卮髑髏載
土生春草後驗者謂前驗者曰明日鍤帽生至矣子
當得代遂脫沉淪因相與噫吁而散明日虞停舟候
之至日中果有戴鍋於首者將涉渚台之故得無恙

其夜前鬼哭甚哀頃之一鬼來謂曰鐵帽生未至乎
曰至矣乃爲唐叅政所救瀟聞之大喜自負必貴日
日親作奏章告於上帝度此二鬼越數日生於齋中
有二人拜謝於前曰蒙君保奏今得生善地矣語畢
忽然不見明年瀟登第官至山東叅政

晉安逸志

傾囊拯人

高南壽福州人赴省試道出衢州境憇大木下聞有
人聲喀喀出于後回首覘之一男子方投繯氣猶未
絕爲解索酌水灌救移時而甦云是開化弓手尉逸
一妾遺跡捕之知其在豪子家欲辨取贖聞欠錢三

萬家窮無由足其數而子姪婿皆充役若徒步歸報必遭譴怒計無所出寧以身死高惻然傾囊資二十千與之遂行是歲中科適調開化尉旣到官詢問所救之人則亡久矣邑有兇盜刼巨室州督捕甚峻期以必得高大窘獨步小亭旋繞百匝未有計忽有拜于階下者驚問何人曰官人無怖某乃昔年蒙恩再生者念無以報德偶知寇所在故來告其人方醉臥郭門外神祠中宜亟往擒之高卽集部曲出門鬼導於前至一大廟群盜祀神飲福醺然醉寢兩輩差不醉方收拾器皿遂悉縛之高用賞格改京官淳熙六

年知隆興奉新縣卒

夷堅志

棄母遭蛇

長溪民爲贅婿於海上人家以漁爲業其母思而往見之民殊不樂母覺其意明日卽告歸民已蓐食先出婦曰阿姑少留俟得魚作羹以別民還至門聞母未去急藏魚于舍後乃歸大言曰今日風惡不獲一鱗母旣行民責妻曰吾適所得皆鰻魚旣多且大平日不曾獲此汝何苦留此媼邪妻往視籃中皆蛇也驚走報民不信自往觀果見群蛇蟠結一最大者昂頭出咋民喉而死蛇皆不見

夷堅志

棄妻下第

宋丙午福州赴試士人李某道經衢州擔簦負篋貧
窶亦甚有店主姓翁夢其家土地與言明日有秀才
獨行赴省姓李者是黃甲人宜善待之店主伺候果
如夢中所言者來遂待以酒食給以裹囊隨以僕從
俾如京師士人曰主人何愛厚如此店主曰本店土
地最靈報我云官人明年登黃甲所以相待也其士
人大喜而夜宿其店心思我作官但妻不稱此時當
娶美者越兩日土地復獻夢于主人曰此士人用心
不善便欲棄妻今無功名矣士人到省回店主一茶

不與且不納之宿士人問其故店主云吾家土地已知君有棄妻之意不復有功名矣果不中

江湖紀聞

冤刑業報

紹興初福建寇亂賊魁曰張義張萬全葉百三提刑李稷臣諭降之二張譖葉於稷臣且言初無降意將復爲變稷臣信之乃植大柱於通衢取葉以鐵索鎖於柱熾炭圍繞醢和五辛飲之備極楚毒稷臣躬臨視之葉大呼曰我已就降何罪至此體皆焦爛乃死自是稷臣每獨坐時見葉在側後三年稷臣徧體生瘡疱狀如火灼痛不可忍卒

睽車志

利市陰譴

閩王審知入晉安開府多事經費不給孔目吏陳峴
獻計請以富人補利市官恣所徵取薄酬其直富人
苦之峴由是寵遷爲支計官數年有二吏執文書詣
峴里中問陳支計家所在人問其故對曰渠獻置利
市官坐此破家者衆彼祖考皆訴於水西大王王使
來追耳峴方有勢人惧不敢言明日峴自府馳歸急
召家人設齋致祭意色愴惶是日里人復見二吏入
其家峴遂暴卒初審知起事其兄潮首倡及審知據
閩中爲潮立廟爲水西大王

太平廣記

借婢白冤

福州人王純字良肱知建州崇安縣一日食炊餅未
終急還衙卽仆地死死之二日衆僧在堂梵唄王家
小婢忽張目叱僧曰皆出去吾欲有所言舉止語音
與良肱無異遂據榻坐遣小吏招丞簿尉皆至錄事
吏亦來婢色震怒命左右擒吏下杖之百語各官曰
殺我者此人也吾力可殺之爲其近怪故以屬公等
吾未死前數日得其一罪甚著吾面數之曰必窮治
汝其人忿且懼賂庖人冥毒前日食餅及半卽覺之
倉皇歸舍欲與妻言不及而絕幸啓棺視之可見丞

以下皆驚呼匠發棺舉體潰爛爲黑汁始詰吏吏頓
首輸服并庖人送府斃之獄中

夷堅志

殺犬化蛇

永福縣有村律院伯仲二僧同房伯僧愛一大每食
必呼使前仲甚惡之見必叱逐或繼以鞭箠如是累
歲伯嘗出外旬日歸不見犬責仲曰汝常日讐犬特
甚乘我之出必殺食之矣仲不得已乃言因其竊食
誤擊殺之埋諸後圃伯殊不信潛往瘞所發視歸語
仲曰犬雖異類心與人同汝與結冤非一日適吾視
其體頭已爲蛇會當報汝汝不宜往再一人往視之

則蛇頭愈長始大恐問所以解冤之策伯教以對佛
懺謝遂入懺堂晝夜不息凡數年一夕焚紙鏹覺盆
中有物意其有鼠撥視之蛇也乘仲張口急奔入喉
中遂死

夷堅志

刮佛金身

城南法海寺舊名羅山本孟司空之第唐咸通中有
道閑紹攷義因義聰弘瑫諸禪師主是山香火不絕
內有放生池寺甚弘敞嘉靖己亥有舉人高叙者請
于御史臺廢其寺爲宅金身之上沃以沸湯覆以濕
紙刮其金箔燒鍊成金不數年高患惡瘡臥床累月

皮膚潰盡僅餘白骨以死人以爲毀佛之報當時有識云舉人廢寺只一甲子至萬曆己亥仍復爲寺竟符其識云

竹窓雜錄

讓塋獲福

林觀閩縣人有隱德嘗卜地塋親得吉壤石也鑿之土術者言後當數世公卿觀曰吾田野人敢望此乎乃取族人火塋者二十四甕俱掩其中必也有福與吾宗族共之未幾子元美第進士孫瀚曾孫庭棨庭機玄孫燦俱官至尚書贈觀太子太保

閩都志

風水有驗

陳週字仲昌閩縣人古靈陳先生之裔生洪武中有
隱德家居義溪其鄉有呂姓者暴發登科偶有他方
堪輿地師卜一吉地欲獻于呂冀其厚酬呂方怙勢
驕倨伺候累日閤人不爲通報地師路費罄罄乃投
仲昌宿焉仲昌家貧躬畊養鴨爲生延欸地師極其
周悉值春雨浹旬仲昌糧食告匱初以鴨卵餉之日
久卵亦餉盡乃併其鴨而烹之地師感其厚德遂以
獻呂之地獻陳爲仲昌遷塋考妣永樂初仲昌長子
叔剛登進士第官翰林侍讀封仲昌如其官次子叔
紹亦登進士官湖廣憲副孫曾科甲蟬聯四世而第

進士者九人咸秩顯官呂氏寢以衰微不振

竹窓雜錄

抹鳥解厄

陳魯福州人十五喪父廬于墓側有一黑鳥如鴛鴦爲鷹所搏投其懷魯以衣蔽之得免分羹糝以畜之里中有富民得心氣疾求得是鳥肉魯不可曰始鳥之投吾也吾固活之今以財棄之是不若不救之愈也養之一年毛羽成就乃以綵線結其羽縱之去鳥廻翔盤轉鳴聲哀慕乃入雲表旣十年其世父爲山東尹坐誣謫戍喪明魯往視之世父曰兒來意誠厚然

此轄戎者嚴急有一餘丁必令操習兒不得歸矣匆
勿與銀五兩乃誤持其準僅五錢魯自念伯窮老不
應再索遂行途中爲人談命擇日賴以自濟行至仙
霞關雪甚迷不知道腹又餒自分必死須臾有一黑
鳥起於前嗚呼不已魯祝之曰果吾所養當信我往
如誤鳴繞吾身不誤者則直飛爲導鳥立展翅引之
行三十餘里夜分始逢一舖主人出掖之入園爐久
之問鄉邑曰福州曰福州有陳魯子識之乎曰我卽
是也其主捧魯首哭曰兒也何以至此吾汝父之執
某也因告以來故相與洒泣明旦視樹上黑鳥翅綵

尚在

覽勝餘談

減賑陰譴

淳熙初王浚明曉爲司農少卿嘗以平旦出訪林景度給事值其在省林之妻浚明姪女也齎淚而訴之曰林氏滅矣驚問之對曰天向曉夢朱衣人持天符來言上帝有勅林機論事害民特令減門佈而寤猶彷彿在目也浚明因留食俟林歸從容扣近日所論奏林曰蜀郡以部內旱災奏乞撥米十萬石賑贍卽有旨如其請機以爲米數太多蜀道不易得當實審斟酌而後與故封還勅黃上諭宰相西川往返萬里

更復待報恐於事無及姑以半與之可也只此一事耳未幾林以病丐歸到福州捐館有三子繼踵而亡王氏求諸林族子嗣之亦輒不終竟絕嗣

夷堅志

黃鰓道人

宣德五年七月督銀場太監周覺成至寧德十三都青巖下令藥魚煉巨石投水中爆烈俾魚驚出是日有道人來告曰一切蠢動咸有佛性乞減藥三分覺成不從但啗以菜飯而去明日下藥石魚蝦盡死中有大黃鰓剖之所食豆腐菜飯尚在覺成遂病恍惚見魚蝦索命而死

福寧志

白猫報仇

萬曆丙子孝廉黃大有久不第戊戌挾二蒼頭之嶺南訪其故人先是止一僧寺見有白猫毛色瑩潔黃甚愛之每食必呼猫與之食因請于僧欲捐錢易之僧不許黃固求之僧不得已許焉携往訪故人歸途中有盜窺黃裝頗裕刼殺主僕匿其屍只存一僕浮水而遁其所携白猫盜亦掠去後訴之官絕影響無從捕獲嚮者寺僧亦頗聞其事忽一日僧行肆中見有籠繫白猫賣猫見僧哀鳴不已如訴冤狀僧密探之乃盜所寄于肆中者也僧首之官俱捕獲伏辜追

其匿屍殞歛歸觀焉

竹窓雜錄

白蛇金穴

趙生者宋宗室子也家苦貧居閩之深山業薪以自給一日伐木溪上忽見一白蛇昂首吐舌若將噬已生棄斧斤奔避得脫妻問故具以言因竊念曰白鼠白蛇豈寶物變幻耶卽拉夫同往蛇尚宿留未去見其夫婦來回首遡流而上尾之行數百步則入一巖穴中就啓之得石石陰刻押字與歲月姓名乃黃巢手瘞治爲九穴中穴置金甲餘八穴金銀無算生掇取畸零仍舊掩蓋自是家用日饒不復事薪隣家疑

其爲盜告其姊之夫嘗爲吏者吏詢之嚴不敢隱隨
餽白金五錠吏貪求無厭訟之官生不獲已主一巨
室悉以九穴奉巨室廣行賄賂有司莫能問迨帥府
特委福州路一官往廉之巨室私獻金甲因回申云
具問本根所以實不曾發掘寶藏其事遂絕路官得
金甲珍襲甚至任滿適其妻徙置榻下一夕聞繞榻
風雨聲頃刻而止頗恠之夫歸共取視鏑鑰如故啓
籠乃無有也生無子夫婦終老巨室

榕陰新檢卷十二

閩徐 燭興公輯

歙吳洵美克符校

數兆

九僊祈夢

何氏九僊者以祈夢著靈異相傳漢時有兄弟九人學道先居福州九僊山後遷石竹山再遷九鯉湖故山水多以九僊名山上有道觀其中塑九僊像及傳夢判官人祈夢者先於判官前致禱祀以白鷄因留宿祠中夜必有夢起用琰卜之如得勝兆則已否則

及夜再祈如有童僕相隨者其夢亦同多爲隱語過後始驗常熟雙鳳鄉人顧某母老問壽數夢神擲與一布裘卽諺所謂撩滕者後其母病滕疽而卒不悟撩滕者猶云了滕耳長洲學生徐昊托朱教諭家人祈終身事返報云夢到一高山下但聞大風刮地而已後十餘年昊以蠱病死易卦山下有風爲蠱也文太守林知温州時遣二隸往問壽數荅云問孔老人自知之先是文命孔老人鋸一木隸還報知明日文升堂老人適跪白板數云五十五片與文年數正合爲之竦然問曰尚可解乎曰朽爛不堪解文大不樂

未幾疽發背卒王御史獻臣故蘇人而占籍京師旣
貴嘗有桑梓之思自謂他日得嫁女於蘇且有一居
宅卽留家於此及知浙之永嘉使從者往乞靈以決
二事先問嫁女云白石階前先唱第也是龍華會裏
人又問居宅乃夢到一所門貼一道家符上有二印
後王女歸於朱狀元希周之子及買第城東併得一
道院入門見楣間一符上有天師印二與夢合於是
定居焉閩守妻有姪守到官久未得家信使祈所生
男女報云是福寧不是福清守大喜曰吾得男矣問
之曰吾行時語妻云生男當名福寧生女當名福清

義取閩之二縣也數日報至果然莆田黃如金弘治
甲子舉鄉試第一前此有鄰縣儒學一齋僕祈夢於
九仙欲知是科解首得報云烏一黃二水桶門裏借
問黃如金便是思本學諸生無此姓名者乃之莆田
訪焉侵晨順途而至一所有兩人立於門邊揖之曰
此有黃如金秀才家乎曰此卽是也問兩人姓名曰
烏一黃二皆黃氏僕也窺門中則有水桶在焉黃果
首選

庚巳編

閩王符讖

景福二年五月王潮陷福州范暉死之潮自稱留後

是年建州刺史徐歸範汀州刺史鍾全慕俱叛附于王潮初潮之未至也閩人謠曰潮水來巖頭沒潮水去矢口出其後潮入閩而觀察使陳巖率及潮卒而其弟審知代之是其驗也王審知身長七尺六寸面紫色方口隆準初潮之幽緒植劍於地與衆盟曰拜而倒者爲師至審知拜劒躍而起衆遂推之審知讓潮而已副焉其營上常有紫氣識者曰此軍中必有貴人旣總府事時四方竊據或勸其建國審知曰寧爲開門節度使不作閉門天子在位二十九年

三山

志

一飯前定

宋淳祐戊午間三山繆文龍幼學京庠一日謁建漕
節齋陳昉繆意謂陳當路可規求權局行次衢之江
山縣乞靈于江郎廟神賜夢遊一所官舍廊廡邃深
有士官數輩巍冠博帶翺遊其間少頃有一人捧一
碗飯進與繆繆下視之則真珠飯也殮未及半進飯
者復奪之夢覺卜之于神果神所賜夢也及來富沙
我書於節齋節齋謂繆曰西津鎮建安書院有朱文
公真西山之祠今請君爲堂質一月可得官楮五百
貫之俸少爲養廉之助繆遂奉命至書院一如夢中

所見會食堂中飯未畢繆之母計音至卽以憂去真珠飯者益朱文公真西山二賢之祠云

江湖紀聞

陽官冥召

嘉靖丙寅馬恭敏公督漕夢儀衛甚整來迎曰楊州城隍有請公曰我方爲陽官有何冥召曰未也第請公相見叙次此中城隍一載一遷凡十五遷方到公耳遂醒萬曆庚辰公謝世距丙寅正十五載矣

馬公逸事

試對知貴

宋陳北溪有子名譚年方十一陳令其追陪晦翁器

度英偉晦翁出一對試之曰一行朔鴈避風雨而南
來讎卽應曰萬古陽烏破烟雲而東出晦翁大奇之
謂北溪曰此子氣象不凡異日名位當見烜赫後果
爲龍圖閣學士

鶴汀私抄

二狀一母

長樂民馬某娶妾生一子名鐸嫡妬不容嫁同邑李
氏復生一子名馬後鐸中末樂壬辰狀元馬中戊戌
狀元上于馬旁加其字名李騏一母生二狀元大是
異事

耳談

夢馬踏首

馬鐸長樂人永樂壬辰狀元鐸幼與同邑林誌共學誌學博才高鐸亦推讓之誌鄉會俱第一殿試罷遍扣諸名士之作皆不已若深以狀元自負迨傳臚之夕夢有馬踏其首旣而馬果第一甚快快不服每欺馬互于上前爭之上曰朕出一對佳者爲優出題云風吹不響鈴兒草馬卽對云雨打無聲鼓子花上大稱賞誌踰時不能對遂愧服先是鐸幼時祈夢前程夢神人告曰雨打無聲鼓子花不知其意至是用之益天設也

異夢類徵

木人騎馬

李騏長樂人永樂戊戌狀元上科狀元陳循有馬上
插旗之夢至是循又夢迎新狀元一木人騎馬上執
一令字黃旗及傳臚狀元李騏騏原名馬上御筆改
馬爲騏始知木人爲李黃旗應御書字也

異夢類徵

龍頭狀元

龔用卿懷安人嘉靖丙戌廷試前夕自夢神寫狀元
字於龍頭上往年廷試納卷彌封官以會試前列及
平昔有聞望者潛送內閣內閣密覘儀貌以定一甲
之選是科禮部尚書疏其弊彌封官不得與閱卷官
通同傳臚之晨內閣方執卷品評未敢遽決適車駕

往西宮拆柳必了此啓行內侍促卷數次恐上久待
潛于卷中抽三卷進呈上亦未覽望見龔用卿姓名
曰此龍頭也御筆遂書第一名內閣知之奉行而已
異夢類徵

大魁先兆

陳謹閩縣人嘉靖壬子鄉試監臨御史曾佩榜出之
後退而假寐夢狀元龔用卿公來謁心期諸士中必
有大魁天下繼龔而出者已而陳獨先諸士報謁曾
遂以夢語衆官癸丑春陳果中狀元陳自夢坐蓮花
中冉冉乘雲端亦應聯登之兆 異夢類徵

以娣元吉

翁正春侯官人生時火光滿室焰至榻前經宿始散
幼卽聰明奇偉及長膺鄉薦父任延平府教授元旦
夢人贈彩帳上書以娣元吉四字郡守周公解曰以
娣乃易帝乙歸妹卦詞元吉爲狀元元吉兆後臚唱果
然先是公授龍溪教諭聞海上龍吟三日以爲龍溪
應出大貴不意乃應于公耳

異夢類徵

獅走狗吼

福州舊有識云獅兒走狗兒吼狀元在門首皆莫曉
至黃朴賜第之年元日其家相對屋上瓦獅墜地群

犬從而吠之已而黃魁天下

常居聽輿

相術先見

曾寶福州人爲湖廣道御史同袁忠徹預宴于東角門忠徹視寶曰骨肉停勻眉高額廣天庭紫氣連驛馬不三月當陞然聲中帶殺終掌風紀應在坤方但井竈之下常黑須防水厄果擢廣西憲使後五年溺死

古今識鑒

四明城隍

鄭珞字希玉初與計偕策蹇驢之京道逢袁忠徹下車揖之曰君骨相非凡精神秀異乃吾郡之城隍也

明歲必第五年之內當守四明祿位甚長然亦終于此
此戢公來年果第歷官戶部郎宣德二年宣宗廷選
部臣才能卓異者分治天下處郡公得寧波陞辭之
日御製招隱歌親灑宸翰并密勅一道賜之公蒞任
佯爲不更事者老吏奸宄屢有所請白公唯唯而已
甫三月公忽登堂召諸生耆老宣密勅畢詰前老吏
數其罪立命健卒拉殺之同日死者三十餘人郡政
肅然以後興利剔蠹皆露章條奏凡在任十三年丁
內艱詔奪情視事竟卒于官卒之日宦橐惟圖書數
卷耳百姓奔哭如喪考妣立祠祀之嘉靖初從孫威

亦以進士守是郡有惠政與公並祀名宦

三山鄭氏

家譜

入都賣卜

閩士曹仁傑淳熙末預秋榜待補明年入都貧無裝資假賣卜自給在市售卦一人來卜爲畫一官人發怒一事字甚大而无挑脚憂字半缺一喜字下畫不滿解之曰君當恐官事其禍大如天然憂不成出此月翻有獲財之喜客請其說曰官旣怒爲可憂而事不員故知無害憂去財喜至以下畫缺須候改月乃吉客曰誠如所言吾必奉謝欣然而去後旬月持二

萬錢來饋不談曲折但云足下之術通神都城卦肆
滿街無如公者當廣揚盛名少効寸力耳曹之友叩
之笑曰我本不能卜筮而粗曉相法認彼是公吏非
有公事不求卜視其面色不見有災危以是言之後
訪其人果是府吏因治獄求賕怨家將告之惧甚府
尹置不理遂得錢三百千

夷堅志

謫宦免難

劉器之謫英州宰相章子厚必欲寘諸死地福唐人
林某以書生晚得官用縣尉捕盜賞格改秩入京往
謁章曰嶺外小郡於銓法注知縣資叙今英州見闕

計資可擬願得從堂除冀爲相公了公事章悟其意
答曰君能舉職當遂以轉運判官奉處林生甚喜兼
程南去不兩月及境郡僚出迎劉公不携妻孥但從
一道人寓近郊五里山寺道人與孔目吏善是日垂
泣告劉曰適孔目密報新使舉措殊不佳未交印已
諭都監吏引軍圍寺約三更鳴鐘將加害命我速引
避我不忍也公必不免乞自爲計不可坐待迫辱執
手大慟劉咄之曰人之生死前定何用懼汝出家學
道見識乃爾劉好食鷄粥率以二更食然後睡至是
謂之曰吾家卽就寢安神定志以俟之汝爲吾作粥

俄頃鼻息栩栩然道人泣不止淚落粥中忽聞鐘聲
急撼劉覺鷄猶未熟強盡一器明燭作書已而寂無
所聞遣僕視外間不見一人危坐待旦始知林生纔
到徑詣郡齋自謂得策趨上堂不覺蹴戶限仆地立
死鐘聲者乃無常所擊云

夷堅三志

夢中誦賦

嘉靖己酉福建鄉試四明屠公大山爲提調官先是
御史陳公宗夔已得首卷屠公偶閱黃士觀文於落
卷中薦之御史竟置第一是夕屠公作美人賦志喜
明日士觀謁御史御史令謁屠公公出賦示觀觀錯

愕曰士觀前夕夢中誦之矣嗚呼士之遭遇豈不奇哉

屠司馬年譜

金梅枯枝

雲南黃副使者有養子閩人也慧過諸兒諸兒交妬之乃呼從史陳綸告之曰能全是兒者惟掾掾幸子之綸收而撫焉眎其子聽改名之曰狝狝聽交愛殊黃家兒無何並試弟子員高等督學使者察狝籍閩也黜落之綸乃泣遣狝歸歸則登閩省試聽亦起家于滇後歷官中原交通如常一日聽宅有金梅忽枯一枝未幾狝之訃至逾年復枯一枝未幾聽卒二氏

子姓竒其事爲作金梅傳翀復姓游名申祐謝司農
公杰爲作金梅篇云丈人收春春滿堂丈人愛花花
繞廊金梅一株更竒絕殊根合榦叅群芳南枝乍長
北枝短北枝煖比南枝煖雨露無私春色勻庭前歲
歲花開滿自從花飛歸故叢江鷗海燕各西東連枝
曾入長安市春風幾度桃花紅二十年來八千里岐
路相看悲復喜叢桂山原分小大紫荊花合同生死
北枝旣瘁南枝零卉木無情似有情只今肥瘠分秦
越四海誰堪托弟兄

竹窓雜錄

老娼末運

宣德間閩中一娼色且衰求嫁以鬻終身人咸無委禽者乃以年庚決之術士術士云年至六十當享富貴之養娼不爲然後數年閩人子有闖入內府者聞其母尚存遣人求得之館于外第翌日出拜之見其母貌陋恥之不拜而去語左右云非吾母更求之左右觀望其意至閩求得老娼以歸至則相向慟哭日隆奉養閱十數年而歿

菽園雜記

丘氏墓地

福寧馬鞍山龍壽岡有吉穴政和間里婦周氏者夫死將鬻以畢喪事遲明將立殯婦夜臥一人自外呼

其姓名婦意主家遽出開門見一人紫袍金帶乘白馬立岡上以鞭指之曰此丘十郎地慎勿售之他人詰旦神其事里人丘腴哀而償之率塋其地子丘允官朝議大夫爵縣男服三品食邑三百戶

竹窓雜錄

南庵伽藍

陳堯咨既登第謁陳希夷先生坐中有道人髻髻目堯咨連曰南菴南菴語已徑去堯咨異之問曰向來何人先生曰鍾離子也陳爲惘然欲追之先生笑曰已在數千里外矣陳曰南菴何謂也先生曰他日自知後堯咨轉漕閩中過墟里間聞田婦呼其子曰汝

去南菴促汝父歸堯咨驚問南菴所在往視則廢伽
藍也有碣云某年月日南菴主人滅祠其真身于此
卽堯咨生辰也

列仙傳

鄭啓莫言

嘉靖庚子解元鄭啓謨閩縣人先有莆人鄭啓至鯉
湖祈夢仙曰今年解元鄭啓莫言啓得夢後以解元
自期以莫言二字故不敢露及放榜乃啓謨也啓終
不第

鯉湖志

大司空兆

福州林尚書廷楫未遇時至鯉湖祈夢見一扁上半

大書一司字下半空白無字林以質于道士道士賀
曰此大司空之兆也後官工部尚書

鯉湖志

前定名數

三山蘇大章已未魁南省先戊午鄉試忽夢人告之
曰公與薦在四十一名公覺言于朋友遂傳播其事
有同經忌之者投牒于州謂蘇與主司有私樞使葉
翥叔羽喻之云姑留牒俟拆卷當爲區處旣入院對
號至四十一卷治經果符夢中語帥出土子牒示考
官云留此一卷不須拆俟填榜畢却于待補經魁取
一卷易之衆以爲然榜畢取卷則原封者却非蘇而

待補者乃蘇卷也帥與主司各大驚異始知得失前
定乃不復再易次年蘇遂登春榜第一

西湖志

榕陰新檢卷十二終

榕陰新檢卷十三

閩徐 煥興公輯

歙吳洵美克符校

勝跡

南澗石佛

唐天寶八載五月六日清晝忽大雨騰涌風雷殷空
須臾風定雷收南澗寺石巖上隱出真像三十二相
列侍環衛品覺有序莊嚴供養文物咸秩

歐陽詹集

喝水巖

唐僧神晏住鼓山湧泉寺東西有二澗晏誦經惡水

聲喧轟叱之水迤流西澗東澗遂涸萬曆初年蜀僧
寶珠者始創小庵于洞爲止宿之處遊人便之先朝
題刻之多無過此洞者因僧創庵亦微損鑿洞門前
一絕句頗有風韻而年月名字已鑿斷矣今考鼓山
舊志漫錄于此重巖複嶺鎖松關只欠泉聲入座間
我若當年侍師側不教喝水過他山淳佑乙酉徐錫
之題

竹窓雜錄

飛來山

後漢元和三歲獵者張五郎卽禽於郡北之西巖見
白鹿犇入巖中五郎尾之行可數百武皆兩巖壁峙

仰不見天側肩而進意將闌忽聞樂聲遂復前百餘
武微見日光如縷折而東石門半開豁然別一天地
有四人衣冠古朴一鼓瑟坐梅花樹下一坐磐石臨
流吹笙一倚脩竹擊磬一騎白鹿執如意而歌見客
至皆舍樂驚起相問何從得來王歸未也五郎不審
所謂其人曰吾越王樂工也昔者夫椒之役吾抱樂
器竄身于此石門忽閉遂不得出乃掘黃精採松葉
爲糧久之亦不復饑於是相與結茅而居績野葛麻
苧以爲衣服時有仙人來此分惠藥物然竟不知吾
王今何如也五郎聞之大駭求歸其人各以鹿脯黃

精爲贈旣出石門卽闔其後人遂以此山越王勾踐
時自會稽飛來因名飛山晉太康中道人任放復入
巖中得傳金丹秘訣至唐天寶中昇舉於此復名昇
山唐周朴有詩云昇山自昔道飛來此是仙功莫浪
猜氣色雖然離禹穴峰巒猶自接天台巖邊枯樹風
衝落頂上浮雲日照開南望郡城塵世界千秋萬古
捲浮埃

晉安逸志

羅漢寺

候官五百羅漢寺在烏石山之麓本雪峰解院貞明
五年閩王審知夢焚僧數百奕奕有光光所至處有

雙檜並池而秀一僧擎跪而前曰王能飯吾於此乎
及旦圖而訪之得今寺地百步池檜皆如夢中乃爲
堂環之命池曰浴聖檜曰息聖改今名有放生池

山志

螺女江

唐開元間道士許甲齋釣於候官白龍洲俄有一大
螺浮江而至道士釣得螺殼合抱中有女子年可十
五六姿色絕佳仰謂道士曰妾徐水仙第三女也聞
先生有冲舉之方故假此而見耳道士因與印證所
聞各試其小方有頃女子復螺而去至南洲遂棄螺

登高益峰見其地有苦參卽採之洗於山下皆成甘
草良久乃於峰頂上昇今此峰名徐女峰白龍洲因
名螺女江南洲因名螺洲

晉安逸志

按梁任昉述異記云晉安郡有一書生謝端爲性介
潔不染聲色嘗於海畔觀濤得一大螺如一石斛剖
之中有美女曰予天漢中白水素女天帝矜卿純正
令爲君作婦端以爲妖呵責遣之女歎息升雲而去
又千寶搜神記云閩人謝端得一螺大如斗每出歸
盤飧必具端疑伺之見一姝麗甚問之曰我天漢中
白水素女帝憐卿少孤遣妾具膳今去留殼與君端

用以貯糧其米常滿資給數世三說不同未知孰是
竹窓雜錄

瑞迹寺

大中六年有邵環者遊閩縣瑞迹寺頓聞異香又白光燦然環乃卽其光而往見銀色化佛須臾入枯木光又不散因現足跡於盤石後人於石對鑿一跡未幾亦磨滅而舊跡獨瑩然因刻像有禱必應

三山志

爐峰廟

爐峰廟在侯官縣北唐景福中王氏入閩淮民隨之始至有桴浮香爐及書硯漂于岼側其人異之曰此

吾州社三郎故物也因創爲祠通文三年號高義侯
永慶元年改稽聖侯保大中升爲靈端王之廟云
三山志

溫泉

閩縣崇賢里地多溫泉數十步一穴迸河渠中味甘
而性和勝者氣如硫黃閩天德二年占城遣其國相
金氏婆囉來道里不時徧體瘡疥往而浴之數日卽
瘳乃捐五千緡創亭其上仍售田鳩僧以司之陳莊
記慶曆二年修有蕃書二碑在福州溫泉二十處一
在閩縣崇賢里河邊一在閩易俗里東門外晉安橋

北左右二池一在湯門內今置十槽一在湯門外河
邊呼爲官湯一在井樓門外名雙槽一在湯門外名
石槽一在井樓門外名石壁一在候官八都一在候
官九都一在候官方山上二石池一溫一冷一在懷
安六都溪邊一在古田湯渡頭一在閩清十九都一
在閩清賀恩里一在連江光臨里一在永福縣中一
在永福十八都溪側一在永福十五都名大小湯大
湯四池小湯二池一在永福十九都一在永福二十
六都惟永福清長樂羅源無之

竹窓雜錄

甘棠港

福州海口黃碕岼橫石巉峭常爲舟楫之患王審知
爲福建觀察使思欲制置憚于役力乾寧中因夢金
甲神自稱吳安王許助開鑿及覺言於賓寮因命判
官劉山甫往設祭祭未終海內靈恠俱見山甫憇於
僧院憑高觀之風雷暴興見一物非魚非龍鱗黃鬣
赤凡三日風雷乃霽已別開一港甚便行旅驛表以
聞號甘棠港閩從事劉山甫乃中朝舊族也著金溪
閑談十二卷具載其事

北夢瑣言

化城寺

昔有居士夜遇兄逐之至山中忽見僧舍遂止宿達

旦茫然林莽居士詰之僧曰此天冠化成寺也今時
聞鐘聲或燈光隱隱寺南有望鐘亭早禱屢應

志

丈六金身

唐天祐三年丙寅七月閩王鑄金銅佛像一尊高一
丈六尺菩薩二尊高一丈三尺銅爲內肌金爲外膚
王先于己未秋夕夢天之西際綵雲罅裂大佛中座
言曰斷予一臂衛予一方旣覺思肖其形像鑄之是
年鳩工開爐卜境擇日鑄斯佛于九仙山定光多寶
塔之右古仙徐登上昇之地其日天氣清明江山四

爽橐爚之上騰爲烟雲盤旋氤氲五色成文又有群
鳥如鴻鵠交翔而鳴自寅及午斯佛一瀉而成翌日
禮閱之與夢中一類長短大小無差初工人以其像
大慮其不就以一臂別鑄而合之暗符夢中冬十二
月王迎于開元寺壽山之塔院獨殿以居之翼二菩
薩于左右明年正月十八日設二十萬人齋號無遮
會以落之時郡人黃滔爲記

黃御史集

定光塔

唐天復三年甲子閩王于九僊山造報恩定光多寶
塔追薦先君司空先秦國太夫人開基掘地深一丈

五尺得寶珠一粒坐以金錢大不及拳光能奪目塔
七層八面方七十七尺高二百尺懸輪之鐸一百九
十懸層之鐸五十有六角瓦之神五十有六其內門
門面面繪以金像不可勝數其西建塔殿其北建報
恩變相堂九間僧堂五間茶堂五間又有華鍾樓長
明燈臺東南建地藏殿一間功德堂五間公廳四間
範金績幅千形百質悉諸天之儀像又庫厨五間浴
室三間行廊三十三間摠費財六萬餘貫

黃御史集

定光塔瑯琊王審知所創宋景祐中雷震其西北隅
主僧行秀得施錢九百萬葺治五年而工畢元大德

間漸以頽圯勢將壓焉至元庚辰僧寶峰文鼎悉撤其故壞易以堅良其下爲木楹更以石者凡三十有二其級七其面八又其上爲相輪鈴鐸及至正乙酉凡六載始竣事昭武黃鎮成記之

秋聲集

無名仙篆

福州永福縣觀音院後山上世俗多傳以爲仙篆太常博士黃孝立閩人也嘗言其山無名上多頑石無復鐫刻之蹟如人以手指畫泥而成文文隨圓石之形環布之如車輪循環莫知其首尾今人亦有以道家之言譯之旨曰勤道守一中有不死術亦莫知其

是非也

歐陽文忠集

黃蘗山洞

黃蘗山在福清清遠里唐黃蘗祖師道場也其山有十二峰週遭數百里山中有九潭一潭最深有龍蟄焉宋人鐫靈淵二字于側篆書古拙其傍更有小字磨滅不可讀潭水涯爲瀑布龍湫不可名狀山行四十里至鱗洞不敢入山麓有寺舊甚宏麗嘉靖中燬于倭火梁江淹嘗爲崇安令入閩遊茲山詩云長望竟何極閩雲連越邊南州饒竒怪赤縣多靈仙金峰各虧日銅石共臨天陽岫照鸞采陰谿噴龍泉殘矼

十代木廡萃萬古烟禽鳴丹壁上猿嘯青厓間秦皇
慕隱淪漢武願長年昔負雄豪威棄劍藏名山況我
葵藿志松木橫眼前所居同遊好臨風載悠然

竹窓

雜錄

釣臺盤石

釣龍臺上有盤石越王餘善釣白龍處也三山志以
爲無諸受漢冊卽此地又名越王臺有石刻全閩第
一江山六字宋太守趙汝愚八分書古南臺三字唐
韓偓流寓閩中題詩云無那離腸日九迴強舒懷抱
立高臺中華地向城邊盡外國雲從島上來四序有

花長見雨一冬無雪却聞雷離宮紫氣生冠冕試望
扶桑病眼開

竹窓雜錄

萬壽橋

閩之會城三面距江其水皆自高而下迅湍回洑旁
折千里滙爲南臺江昔以舟楫比連大壚爲浮梁每
潦漲率至絙絕舟裂民多溺焉至治三年僧法助命
弟子吳道可走京師疏聞于上詔率成之不一年得
錢數百萬貫乃爲墩二十八工未成而師化矣後二
年其徒法喜輩終成之長一百七十丈御史中丞曹
公扁曰萬壽橋仁宗朝賜璽書加僧號弘濟大行禪

師尚書馬祖常爲碑銘

馬石田集

六洞仙山

永福縣六洞仙山山極高而秀舊有仙居之風雨晦
冥不可測又時有音樂出巖洞外鄉人有沿厓而至
其地者遇二人對奕越明再造不復見焉衆以爲異
遂刻六洞仙像於其上禱雨求夢屢有應驗昔嘗有
縣尉因歲旱詣山乞靈茹葷而往未至有蜂數百若
將螫焉竟不達對面南山有三石室石室中有一石
龍四面雲霞分明如畫龍口出泉鑿井貯之四時不
溢亦不竭

閩掌故

芙蓉洞

芙蓉院在懷安縣稷下里有芙蓉洞洞口可丈許縈紆十餘里遊人篝燈秉炬以進緝乳時滴陰風迫人五里至義存祖師開山堂可坐百人有石牀石鼓石盆過此益凜凜不敢進難窮其際按舊志院創自唐咸通中宋太平興國修建國朝林子羽有夜宿芙蓉峰詩今湮塞日久莫能尋覓

竹窓雜錄

七星井

布政司前七星井舊志以爲宋提刑蘇公舜元所鑿其六在宣政街之內其一在還珠門之外井有亭覆

之署曰一福井二福井王敬美閩部疏云布政司前
多甃甘泉土人初名曰第一泉第二泉每大比五魁
多爲泉人所占以爲泉識也改顏曰一福井二福井
然每開榜泉土褒然如故

竹窓雜錄

石鼓潭

長樂縣北海中有石鼓潭四面皆鹹潮中一窠淡水
鹹潮不能混土人泛舟驗之良然

竹窓雜錄

碧玉潭

候官古靈溪流清駛潭底有五色石燦若機錦遊魚
往來鬐脊可數聞欬聲聲劃然一散匿伏不見並岨

密竹駢植幽草丰茸潭上老榕陰可半畝名碧玉潭
元吳海有記

竹窓雜錄

龜湖廟

永福縣西南有龜湖廟宋末黃大夫與元兵接戰至
洪塘爲追兵所斬大夫英勇異常身首二處猶持其
頭以就頸口尚噴噴欲言遇一姬忽出聲曰頭斷可
續乎姬荅以不能遂仆於地鄉人異之爲立廟辜嶺
寨

釋異類纂

通霄路

鼓山山門之外扁曰通霄路古今遊山作記者甚多

都不曉其義寺僧無有知者按禪宗正脉鼓山神晏
赴大王請雪峰門送回至法堂遂復趨至中路便問
師兄向甚麼處去鼓山曰九重城裏去曰忽遇三軍
圍繞時如何鼓山曰它家自有通霄路今山門之扁
字法古勁不署姓名乃前朝蹟也

竹窓雜錄

宿猿洞

宿猿洞恠石森聳藤羅陰翳昔隱者畜一猿因名景
福三年築城隔于墻外卽今之豹頭山也湛郎中有
二十五味羅源林逋詩云幾年形勝晦南州一旦聲
名藹湛侯夜色併來三島月水光分破五湖秋荔枝

影裏安吟榻紅藕香中繫釣舟金印解還天子後詔
書重起不回頭洞中有荔枝樹名洞中紅今其地廢
爲叢塚

竹窓雜錄

靈津廟

靈津侯廟在候官縣相傳始有物浮波間達境上睨
而視之石也衆異之遂立廟今有唐勅黃漫滅不可
讀

三山志

榕陰新檢卷十三終

榕陰新檢卷十四

閩徐 煥興公輯

歙吳洵美克符校

物產

北苑試新

仲春上旬福建漕司進第一綱臘茶名北苑試新皆
方寸小夸進御止百夸護以黃羅軟盤籍以青簞裹
以黃羅夾複臣封朱印外用朱漆小匣鍍金鑲又以
細竹篾絲織笈貯之凡數重此廼雀舌水芽所造一
夸直四十萬僅可供數甌之啜耳或以一二賜外郎

則以生線分解轉遺好事以爲奇玩茶之初進御也翰林司例有品嘗之費禁中大慶賀則用大鍍金斃以五色韵果簇飣龍鳳謂之繡茶

西湖志

龍團茶

茶之品莫貴于龍鳳謂之團茶凡八餅重一斤慶曆中蔡君謨爲福建路轉運使始造小片龍茶以進其品絕精謂之小團凡二十餅重一斤其價值金二兩每因南郊致齋中書樞密院各賜一餅四人分之宮人往往鏤金花於其上其貴重如此

歐公歸田錄

清人樹

僞閩甘露堂前兩株茶鬱茂婆娑宮人呼爲清人樹
每春初嬪嬙戲摘新芽堂中設傾筐會

清異錄

福清法帖

福清民家舊有板刻絳帖急就章鴈塢題名四帖其
刻頗精賣碑家得之往往駕名官帖以惑人但彼中
匠者不善用蠟每每有研光痕可以証驗

法帖譜系

閩中木棉

續博物志聞閩中多木棉植之數千株採其花可紡
爲布李商隱詩木棉花發鷓鴣飛王獻詩紙錢灰出
木棉花南中木棉樹大盈抱花紅似山茶黃蕊花片

極厚近峰聞畧云棉花入中國自我朝始丘文莊公
記之詳矣舊所云木棉卽今之斑枝花也棉花種爲
番使黃始所傳今廣中立祠祀之沈黃門炤曰番中
有青紅白三種今特傳其白者耳

琅邪代醉篇

勝畫荔支

長樂產勝畫荔支七月熟味極甘美

竹窓雜錄

郡守植榕

宋熙寧中閩越地多植榕樹其木擁腫不中繩墨郡
守程師孟命閩人多植之自爲詩曰三樓相望枕城
隅臨去重栽木萬株試問國人行住處不知還憶使

君無至今目爲榕城

詳譚采餘

榕木材不中用爨不生焰至福州始多而鉅扶疎旁
出根如流蘇下垂着幹卽抱負爲一輪困連拳好作
怪狀其根盤地陵嶒蚪臥恒畝許多根故易茂而難
拔不才故寡伐而長壽其自處暗與道合者居民植
之以當堪輿之屏翳行子賴之以爲憇息之嘉庇豈
所謂無用之用邪

閩部疏

斷腸草

斷腸草一枝三葉葉大如萋食之輒死山谷間在有
之民間有鬪不能勝服之令妻子扶而之怨家死焉

其妻子利之亦不甚禁也怨家富而畏事厚償之去
不者亦服以抵償官惡其事下令服草死者不給埋
錢第令致斷腸草十斤於官而焚之計久而消然不
能盡除也解此毒者首以蜜灌之已復灌羊血吐出
可不死

閩部疏

建蘭

蘭以建名而福興四郡爲盛民家無大小皆傳種之
然絕不生山間不知種所自來大都以玉鮎爲最四
季開者爲珍又賽蘭蔓生樹蘭木本生其香皆與蘭

埤

閩部疏

閩中方物

屠緯真席上座客競談閩中山海珍
恠鄭翰卿閩產也
緯真命賦詩紀之
翰卿連賦四律頗盡閩中風物
其一云海上孤城控大荒
管絃聲裏六街香
荔支新剥琉璃滑
袖肉初開琥珀光
赤甲美人還有舌
紅螯公子已無腸
思鱸客尚投簪去
語罷徒令憶故鄉
其二云風捲旌旗暗
舳艫鼉鼉吹浪島
雲孤燕窩細自盤
銀縷鬣子光疑迸
玉珠月出山魈驅
虎豹潮平海鬼探
珊瑚日南貢道雄
天塹夜夜神魚送
寶桴其三云五嶺
雄關瘴霧開
千溪如帶自天來
榜亭橋斷虹

蛻老劍浦灘崩黯淡哀赤鯉湖邊仙子宅白龍江上
越王臺鷗鵬秋起波濤怒鎮海樓高鼓角催其四云
山海重關控福唐一春榕葉暗江鄉艫舫絕島窺鮫
室舴艋乘潮拆蠣房紅綻芭蕉霜後色白簪茉莉月
中香窮陬自昔稱鄒魯今日詞華獨拔場

竹窓雜錄

鼓山細茶

鼓山靈源洞之後居民數家種茶爲業地名茶園產
不甚多而味清冽王敬美督學在閩評鼓山茶爲閩
第一武夷清源不及也同時僚屬陳玉叔頤道行諸
公大加稱賞時價茶一兩索價一分敬美諸公嘆其

極蔗邇日兩臺藩臬府縣科取一斤給官價一分種
茶村民逃竄鼓山寺僧重施箠一歲所產輸官不
足民間俱不得食矣

竹窓雜錄

榕陰新檢卷十四終